



UNIVERSITÄTS-
BIBLIOTHEK
PADERBORN

Universitätsbibliothek Paderborn

Ioannis S. R. E. Cardinalis Bona Opera Omnia

Tribus Tomis comprehensa

Opvscvla Spiritvalia - I. Horologium Asceticum. II. Principia Vitae
Christianae. III. Manuductio ad Coelum. IV. Via Compendii ad Deum. V. De
Sacrificio Missae. VI. De Discretionem Spirituum ... Operum Eminentiss.
Cardinalis, Tom. I

Bona, Giovanni

Parisiis, 1677

§. 5. Quid noctu servare oporteat

urn:nbn:de:hbz:466:1-9969

laudate dum ego dormio, & me ab omni malo defendite. Tu denique beatissima Virgo, mater pulchræ dilectionis, protege me hac nocte sub umbra alarum tuarum. Monstra apud Filium tuum te esse Matrem, Matrem gratiæ & misericordiæ, mihi que impetra cor castum & purum, ut in eo quiescat hac nocte dilectus Filius tuus Dominus noster, qui pascitur inter lilia, qui est benedictus in sæcula sæculorum. Amen.

§. V. *Quid noctu servare oporteat.*

Peracto examine conscientiæ, atque orationibus re-
titatis, te honestè ad quiescendum compones, quod
ut sanctè, & meritoriè perficias, hæc observabis.

I. Antequam vestimenta deponas, percurrere breviter
puncta futuræ meditationis, dispone de actionibus diei
sequentis, prævide quid facere, quid dicere debeas, pu-
rificando intentionem, terram tribus vicibus osculare,
cogitando primò quia pulvis es, & fortassis hac nocte
in pulverem reverteris. Secundò, quia Verbum caro fa-
ctum est, totum te ei resignando, & invitando ut cras ad
te veniat in sanctissimo Sacramento. Tertiò, quia pec-
catis tuis locus infimus debetur, & excita contritionem.
Post hæc flexis genibus pete benedictionem à sanctissima
Trinitate, à Christo Domino, à B. Virgine, ab Angelo
Custode, à Sanctis tutelaribus. Demum protestare co-
ram Deo & Sanctis ejus, te nolle somno indulgere ob vo-
luptatem, & propriæ sensualitatis inclinationem, sed ob
naturæ necessitatem, & divinæ voluntatis ordinationem.

II. Cum te exuis, memor esto præsentia Dei & An-
gelorum. Cogita Christi denudationem in passione, vel
animæ tuæ nuditatem ob virtutum inopiam, vel horam
mortis; qua rebus omnibus caducis spoliaberis; vel primi
parentis peccatum, propter quod veste innocentia exu-
tus fuit, & elice his cogitationibus congruentes affectus.
Cum verò lectum aperis, meditare sepulchrum, & fu-
turam citò horam, qua illud ingredieris. Ideo quasi mo-

riturus omnia terrena contemne, ad Deum suspira, renova vota tua, & memor sententiæ in judicio particulari pronunciandæ, magnum Dei judicis timorem concipe. Dic aliquoties, *Iesus Maria*, deinde dic, *In manus tuas Domine commendo spiritum meum.*

III. In strato te honestissimè compone in latere dextero, junctis manibus in modum Crucis ante pectus, & decenter tectus etiam in magno æstu: nec crebro te veritas, sed quietè cuba memor Christi in Cruce pendentis, tum propter Angelicæ puritatis studium, quam te oportet æmulari. Recumbens dic in corde tuo, *Domine Iesu Christe, quàm multi sunt miseri in toto mundo, qui & tecto & lecto carent, tui nihilominus filii, mei fratres, tuo pretioso sanguine redempti, & multò meliores me. Da illis Domine patientiam, & miserere mei.*

IV. Dum somnum expectas, sanctæ alicui meditationi incumbere, ne vacua mens inanibus cogitationibus occupetur: idcirco ad hunc effectum semper aliquid tecum deferres, in quo placitè dormias, quod somniare juvet, quod te vigilantem excipiat, & statum bonæ intentionis restituat. Juvabit pro hac re somnium capere cum beata Virgine peregrina in stabulo, vel cum eadem fugiente in desertis Ægypti, vel cum Jesu infante in præsepio, sive cum eodem pernoctante in monte, vel jacente in sepulchro. Juvabit item imaginari circa lectum sanctissimam Trinitatem, B. Virginem, Angelos, & Sanctos tutelares, quos devotè salutabis: ad pedes autem lecti dæmones, quos detestaberis.

V. Si fortè cubanti negetur somnus; nec opportunum tunc videatur animum referre ad rerum spiritualium meditationem, ne somnus expetitus ea contentione magis prohibeatur, somnum simulabis, & finges cogitatione te sacro vulnere pectoris Christi os applicare, atque ibi per vices attrahens & reddens spiritum, pronunciabis mente vocem, *J E S U S*, priorem videlicet syllabam cum recipis spiritum, posteriorem cum reddis, idque perges

facere, quoties spiras, & respiras, donec sopiri possis.

VI. Si ante somnum subrepat aliqua suggestio, seu tentatio Sathanæ, cave ne in illa obdormiscas, sed quamprimum opportunis remediis reprime, qualia sunt oratio, novissimorum recordatio, refugium ad vulnera Christi, in sinu beatæ Virginis, sub alas Angeli custodis. Imprime fronti & cordi signum Crucis, recogita æternitatem, & si necesse fuerit surge, prosterne te in oratione, nec cesses divinum implorare auxilium, donec redeat tranquillitas. Eadem remedia proderunt tibi, si, cum expergisceris, similis infestatio inimici insurgat, ne subito ingravescens incautum opprimat. Si subito pavore concutiaris, oppone dæmoni signum Crucis, & ferventes aspirationes ad Deum, ipsumque adversarium, & ejus terrificamenta contemne.

VI. Quoties expergisceris, mentem protinus piis suspiriis ad Deum eleva, & dic, *Deus propitius esto mihi peccatori. Educ me de tenebris, & umbra mortis, & voca me in admirabile lumen tuum. Tuere me Domine, ne tenebricosa peccati caligine involvar: eripe me ab omni inquinamento carnis & spiritus: pervigiles tribue cogitationes, & mentem sobriam, ne me gravis opprimat sopor. Fiat hæc nox illuminatio mea in deliciis meis, quoniam memor fui nocte nominis tui Domine.* Recordare item Passionis Domini Jesu, eique gratias age, quod ipse te dormiente ad tui custodiam excubias agere non gravetur. Invita lunam, & stellas, & Angelos ad laudandum Deum: ora pro defunctis, & pro peccatoribus. Et tamen discretionem utere, ne somnus naturæ necessarius ob nimiam contentionem plus æquo abrumpatur.

